

傷寒懸解

四本十四卷三
八種共十六本

傷寒懸解卷六

昌邑黃元御坤載著

陽明經上篇

五十章

陽明實證

陽明以戊土而化氣於燥金。陽明者胃之經。胃者陽明之府。陽明病有經有府。經主傳輸。而府主受盛。病在太陽之經。若胃陽非旺。則二日陽明。三日少陽。六日經盡汗解。不入陽明之府。此總統於太陽一經。不論二三四日。俱係桂枝麻黃之證。雖二日陽明之時。亦不得謂之陽明病。以其

明日則傳少陽。後日則傳太陰。非陽明中土無所復傳之證也。若胃陽素盛。經邪內傳。此方謂之陽明病。蓋正陽當令。則太少無權。而三陰退避。自此而永留胃府。終始不遷。所謂陽明中土無所復傳也。方其府熱未實。經病不罷。是爲葛根湯證。及其胃熱鬱蒸。汗出表解。潮熱痛滿。但用承氣攻下。別無餘事。使非下早。裏虛萬無意外之變。感病之百不一失。甚可慶慰者也。然而物忌盛滿。亢則害。生於此。遷延失下。久而陰爲陽併。精液消亡。土焦水涸。亦歸於死。仲景所以示早攻之戒。而又垂急下之條。早攻則陽去而

入陰。緩下則陰盡而陽亢。遲速均失也。是故承氣之法。妙在緩急恰宜之交。使夫病去而人存。是在良工焉。

陽明經提綱一

陽明一

胃爲燥土。燥則生熱。病在三陽。不論何經之感。鬱其內熱。胃病卽作。以胃家之陽實也。顧陰易盛而陽易虧。故胃有實熱。而非無虛冷。實熱則陽神用事。併陰而歸陽。虛冷則陰邪司權。出陽而入陰。非一致也。然名爲陽明。以其兩陽合明而極盛也。居陽實之名。而有陽虛之實。則陽明不成爲陽明。徒負虛聲矣。是以胃家之實。可曰陽明之爲病。至

於胃中之虛。是名爲陽明。而實爲太陰。尙可曰陽明之爲病乎。仲景於陽明之爲病。冷熱虛實兩立而俱存之。而提綱則曰胃家實也。其崇陽黜陰之意。具見於文字之外矣。陽明之爲病。胃家實也。

胃者陽明之府。陽明之爲病。全緣胃家之陽實。陽實則病。至陽明府熱鬱發。病邪歸胃。而不復他傳。非他經之不病也。三陽之陽。莫盛於陽明。陽明之邪獨旺。不得屬之他經也。胃家之實。而病歸胃府。終始不遷。故曰陽明之爲病。若胃陽非實。則今日在陽明之經。明日已傳少陽之經。後日

已傳太陰之經。未可專名曰陽明之爲病也。

陽明提綱二

陽明二

傷寒三日。陽明脈大。

傷寒一日太陽。二日陽明。三日少陽。陽明之脈大。少陰之脈弦細。若三日正傳少陽之時。不見少陽弦細之脈。而見陽明之大脈。知其傳於陽明之府矣。

陽明外證一

陽明三

問曰陽明病外證云何。答曰身熱汗自出。不惡寒。反惡熱也。裏熱外發。則身熱。熱氣薰蒸。則汗自出。汗出表解。但熱無

寒故不惡寒反惡熱。此後全是內熱爲害。與外寒無關也。

陽明外證二

陽明四

問曰病有得之一日不發熱而惡寒者何也。答曰雖得之一日惡寒將自罷。卽自汗出而惡熱也。

得陽明病之一日。太陽表證未罷。則猶見惡寒。以胃熱未盛故也。遲則胃熱隆盛。孔竅蒸泄。惡寒將自罷。卽自汗出而惡熱也。

陽明外證三

陽明五

問曰惡寒何故自罷。答曰陽明居中土也。萬物所歸。無所復

傳始雖惡寒二日自止此爲陽明病也。

感傷三陽則爲熱傳之三陰則爲寒以陽盛於府陰盛於藏府病則熱藏病則寒也感證一傳胃府則胃熱日增不復再傳三陰而爲寒緣陰盛之人三陽方病於外三陰卽應於中傳陰則後之惡寒無有止期此但入三陰爲寒不入胃府爲熱者也陽盛之人太陽被感府熱鬱生其始熱未極盛猶見惡寒俟至二日熱盛之極氣蒸汗泄則惡寒自止此但入胃府爲熱不入三陰爲寒者也陽盛則生陰盛則死陰莫盛於少陰陽莫盛於陽明病入三陰死多生

少。雖用姜附回陽。難保十全無失。最可慮也。一傳胃府。則正陽司氣。三陰無權。萬不一死。至爲吉兆。俟其胃熱盛實。一用承氣攻下。自無餘事。陽貴陰賤。正爲此也。

陽明外證四

陽明六

傷寒發熱無汗。嘔不能食。而反汗出濇濇然者。是轉屬陽明也。

太陽傷寒。經證未解。發熱無汗。嘔不能食。緣寒邪束迫。胃氣壅逆。故無汗而嘔。食不能下也。而反汗出濇濇然者。必因胃府有熱。蒸其皮毛。是爲轉屬陽明也。

陽明外證五

陽明七

傷寒脈浮而緩手足自溫者是爲繫在太陰太陰者身當發黃若小便自利者不能發黃至七八日大便鞭者爲陽明病也傷寒轉繫陽明者其人濺濺然微汗出也

太陽傷寒陽旺則傳陽明陰旺則傳太陰若脈浮而緩手足自溫是陽明太陰所同且以繫之太陰然太陰身當發黃緣濕土被鬱必見黃色雖脾胃俱有黃證而胃之發黃乃太陰濕土所傳也若小便自利者則濕去又不能發黃太陰陽明何從別之必驗之大便太陰之大便自利陽明

之大便則鞭。至七八日大便鞭者。此爲陽明病也。又太陰無汗。傷寒轉繫陽明者。其人澀澀然微汗出也。此與太陰至七八日暴煩下利條。彼此互文。

陽明來路一 陽明八

問曰病有太陽陽明。有正陽陽明。有少陽陽明。何謂也。答曰太陽陽明者。脾約是也。正陽陽明者。胃家實是也。少陽陽明者。發汗利小便已。胃中燥煩熱。大便難是也。

陽明之病。或自太陽傳來。或自少陽傳來。或由本經自入。自太陽來者。謂之太陽陽明。太陽陽明者。小便數而大便

難膀胱津涸脾胃失潤因而脾氣約結糞粒堅小也。本經
自入者謂之正陽陽明。正陽陽明者胃家陽實不俟別經
之傳一有表邪外鬱府熱自發也。自少陽來者謂之少陽
陽明。少陽陽明者發汗利水膽液枯槁因而胃中燥熱大
便艱難也。太陽陽明者寒水之枯少陽陽明者相火之旺
正陽陽明者燥金之盛也。

陽明來路二 陽明九

問曰何緣得陽明病。答曰太陽病若發汗若下若利小便此
亡津液胃中乾燥因轉屬陽明不更衣內實大便難者是名

陽明也。

陽明病。來自太陽者多。少陽者少。陽盛之人。太陽病感汗下利水。亡其津液。以至胃中乾燥。因而轉屬陽明。燥熱內實。大便堅韌。此名為陽明也。

陽明來路三 陽明十

本太陽病。初得時發其汗。汗先出不徹。因轉屬陽明也。

太陽病汗出透徹。則表解而裏氣亦達。若汗出不徹。表邪未解。府熱鬱生。因而轉屬陽明也。

陽明來路四 陽明十一

二陽併病。太陽初得病時。發其汗。汗先出不徹。因轉屬陽明。續自微汗出。不惡寒。若太陽病證不罷者。不可下。下之爲逆。如此可小發汗。設面色緣緣正赤者。陽氣拂鬱在表。當解之。薰之。若發汗不徹。不足言陽氣拂鬱不得越。當汗不汗。其人煩躁。不知痛處。乍在腹中。乍在四肢。按之不可得。其人短氣。但坐以汗出不徹故也。更發汗則愈。何以知汗出不徹。以脈濇故知也。

病傳陽明之府。而太陽表證未罷。謂之二陽併病。以太陽初病發汗不徹。經熱內蒸。因而轉屬陽明。續自微汗出。而

不惡寒便是府熱作矣。府熱宜下。若太陽表證不罷者。不可下。下則表陽內陷。此之謂逆。如此可小發汗。以泄其表。設表邪外盛。面色緣緣正赤者。此陽氣拂鬱在表。不得出路。鬱蒸頭面之故。當內解外薰。令其透徹。不得小汗。以致邪留。若發汗不徹。陽氣拂鬱。不得外越。其人胃氣內遏。必至煩燥。又覺疼痛。其痛不知其處。或在腹中。或在四肢。按之絕不可得。而且隧路壅阻。呼吸短氣。凡此諸症。皆坐以汗出不徹故也。更發其汗。則愈。此何以知是汗出之不徹。以其脈濇故知之也。濇者陽鬱而不滑利也。拂鬱抑鬱之

意漢書鄒陽傳太后拂鬱泣血楚辭七諫沈江心拂鬱而
內傷薰法以盆盛滾水入被熱薰取汗最捷宜於下部
用之

陽明經病府病汗下總綱一

陽明十二

病人煩熱汗出則解又如瘧狀日晡時發熱者屬陽明也脈
實者宜下之脈浮虛者宜發汗下之與大承氣湯發汗宜桂
枝湯

方在太
陽五

太陽表證未解而生煩熱汗出則煩熱解矣乃汗後又如
瘧狀每日日晡時發熱者此屬陽明也

日晡申戌之交陽
明旺盛之時也漢

書天文志正月旦決八風旦至食爲麥食至昃爲稷昃至
晡爲黍晡至下晡爲菽下晡至日入爲麻各以其時用雲
色占種所宜按日晡在日昃之後下晡在
日入之前正申酉戌燥金得令之時也。陽明有經證有
府證經證表熱外發其脈浮虛府證裏熱內結其脈實脈
實者宜下之以泄其裏熱脈浮虛者宜發汗以泄其表熱
下之與大承氣湯大黃芒硝破結而泄熱厚朴枳實降濁
而消滿也發汗宜桂枝湯姜甘大棗補脾精而和中氣桂
枝芍藥通經絡而泄營鬱也。

陽明經病

七章

府病連經

陽明自太陽傳來未入於府全是經病經病宜汗其未離